



Preventiv 2021

M E S S A D I

dalla suprastonza communal a al cussegl da vischnaunca

Stimau signur president
Preziadas signuras cusseglieras
Preziai signurs cussegliers

Sco usitau figureschan las singulas posiziuns dil preventiv els contos tenor las differentas funcziuns e plinavon vegnan ellas explicadas e motivadas en in commentari detagliau. Perquei serestrenschein nus el messadi sin entginas indicaziuns supplementaras.

Dapi l'introducziun dil model da quen HRM2 vegnan las amortisaziuns quintadas a moda lineara tenor il cuoz dall'utilisaziun. Las investiziuns da construcziun aulta vegnan p.ex. amortisadas duront 33 onns, quellas da construcziun bassa duront 40 onns. Cun l'amortisaziun dallas investiziuns en in project sa vegnir entschiet pér dil mument ch'il quen final per quel ei avon maun. Avon ei in'amortisaziun buca pussevla, quei che ha il disavantatg ch'il deivet dalla vischnaunca vegn stuschaus anavos ed il quen da gudogn e

sperdita vesa ora meglier che quei ch'el ei en verdad. Quella situaziun savess denter auter era esser la raschun per las ponderaziuns davart dil cussegl da vischnaunca da vuler sbassar il pei da taglia. Bein ei vegniu mess avon onns en mira da vuler sbassar il pei da taglia dil mument che la situaziun lubeschi quei pass. Dapi quella declaraziun ha la vischnaunca denton fatg ils davos onns cuntinuadamein pli grondas investiziuns.

Pei da taglia e situaziun finanziaria

Ella votaziun all'urna dils 24 da fevrer 2008 ha il pievel da Mustér giu decidiu d'alzar il pei da taglia da 105 sin 120%. Quell'adattaziun ei succedida cun la finamira ch'ella vali per in temps limitau da quater enfin tschun onns entochen che las investiziuns fatgas en l'infrastructura turistica (Reka, Fontanivas, Center da sport e cultura) portien fretg. La decisiun d'alzar il pei da taglia ei curdada en in favoreivel mument. La nova lescha cantunala da taglia, sin la quala era las taxaziuns dallas taglias communalas sebasan, ha purtau in levgiament pil pagataglia da 7 - 8% (incl. taglia alla fontauna). Ultra da quei ha il Cussegl grond giu decidiu da sbassar naven da 2008 per 5 % il pei dalla taglia cantunala. Plinavon han era las persunas giuridicas giu profitau dalla nova lescha cantunala da taglia cun rodund 25%. Entras l'aboliziun dalla taglia da cumin e dalla taglia pigl uorden da fiug ein sedai ulteriurs levgiaments fiscals. Tut priu ei igl alzament dalla taglia communalala da 15% vegnius cumpensaus per gronda part cun las reducziuns ed aboliziuns da taglias.

Dapi igl alzament dil pei dalla taglia communalala ein gia 12 onns vargai e la vischnaunca ha en quei temps fatg cuntinuadamein investiziuns cunzun en infrastruttura. L'intenziun e la necessitad d'investar en quella dimensiun eran buca enconuschantas igl onn 2008. Las investiziuns han denton purtau a nosa vischnaunca e regiun in svilup positiv, cunzun sil sector turistic. Las grondas investiziuns el territori da skis a Caischavedra, ella nova pendiculara Salins – Cuolm da Vi, el rempar encunter auas grondas ella Val Acletta e l'investiziun decidida la fin da settember 2020 el Center Fontauna han gronda influenza sin la situaziun finanziaria da nosa vischnaunca. En cefras ha il pievel da Mustér decidiu, resp. contribuì 2 milliuns francs pils stabiliments d'ennevar a Caischavedra, 1 milliun francs per la restauraziun dalla baselgia claustrala, rodund 2.3 milliuns francs pil rempar ella Val Acletta, rodund 4.7 milliuns francs per la meglieraziun fonsila ed 8.69 milliuns francs pil Center Fontauna. Plinavon ha la vischnaunca decidiu da star buna per in emprést da 2.5 milliuns francs per la nova pendiculara Salins – Cuolm da Vi. Ils davos onns ei era vegniu investau dabia daners en sanaziuns e novas lingias da canalisaziun, p.ex. frs. 629'000.-- ella colligaziun da Cavardiras cun la serenera Disla.

Esser ella regiun ina vischnaunca cun funcziun da center cun buns aspects pil futur ei segiramein d'avantatg. Quella funcziun pretenda denton era grondas investiziuns en infrastruttura da muntada regionala sco p.ex. il Center Fontauna e quei senza igl agid finanziel dallas vischnauncas vischinontas che profiteschan era dallas investiziuns. Ina situaziun che cuntenta buca adina. Las duas vischnauncas da Mustér e Tujetsch ein en quei grau sin buna via d'anflar ina collaboraziun. Ulteriuras vischnauncas ein envidadas da separticipar.

Nossa vischnaunca ei grazia ad in grond svilup sil sector turistic sco era aultas investiziuns fatgas en quella sparta – ils davos onns cunzun davart investurs jasters e projects che stattan avon la realisaziun – sfurzada dad era investar. Vitier vegnan investiziuns e sanaziuns en l'infrastructura fundamentala dalla vischnaunca che laian buca semplamein stuschar dalla vart. Bia ei fatg, denton ei resta aunc dabia da far.

Il giavisch per ina reducziun dil pei da taglia ei giusificaus, sto denton star en relaziun cun la situaziun finanziaria e las visiuns futuristicas dalla vischnaunca. Il pei da taglia ei ina caussa, denton vala ei da pasentar da l'otra vart l'attractivitat ed il bien futur dalla vischnaunca.

Sebasond sin l'incarica ch'il cussegl da vischnaunca ha dau a caschun da sia seduta dils 14 da november 2019 ha la suprastonza communal eligiù ina cumissiun che duei sclarir la pusseivladad da sbassar il pei da taglia. La cumissiun ei cunzun vegnida incaricada da sclarir:

- *las consequenzas dil sbassament da taglia sin la finanziaziun dallas investiziuns futuras da nossa vischnaunca e metter il resultat en cumparegliaziun cun la situaziun actuala cun il pei da taglia da 120%;*
- *co in cash-flow da minimum frs. 1'250'000.-- sa vegnir mantenius el futur cun in sbassament dil pei da taglia sin 105%;*
- *co optimar las ulteriuras taglias e taxas.*

Il resultats duein esser enconuschents avon ch'il plan da finanzas 2021 - 2015 vegni tractaus el cussegl da vischnaunca.

Buca il davos muort la situaziun davart il virus da corona ha la cumissiun buca saviu terminar sia lavur el temps previu. Ella basegna perquei aunc entgin temps per saver far retschercas e calculaziuns fundadas, sinaquei ch'ella sappi suttametter al cussegl da vischnaunca ina proposta concreta. Cun vusch unanima ha la cumissiun decidiu a caschun da sia seduta dils 9 d'october 2020 da prender il temps necessari en caussa e da sustener il preventiv 2021 sco el vegn presentaus al cussegl da vischnaunca cun in pei da taglia da 120% dalla taglia cantunala.

Las retschercas davart dalla cumissiun che succedan ensemen cun la suprastonza communal nova all'entschatta digl onn niev duein cumprovar, schebein ina reducziun dil pei da taglia selai realisar e sut tgei cundiziuns.

Ella cumissiun davart sclarir ina reducziun dil pei da taglia ein vegnidas eligidas suandontas personas:

- Flavio Murer (president dalla cumissiun)
- Adrian Deflorin, cusseglier
- Edgar Durschei, cusseglier
- Livio Zanetti, cusseglier
- Beat Hosang, cumissiun da gestiun
- Jris Lombris, geraua
- Robert Cajacob, president communal

En sia seduta digl 1. d'october 2020 ha la suprastonza communal eligiù il niev president communal René Epp sco niev commember dalla cumissiun.

En ina seduta culs representants digl uffeci da vischnauncas, Thomas Kollegger, menader digl uffeci e Giachen Caduff, cussegliader per nossa vischnaunca, ensemen culs commembers dalla cumissiun da gestiun, dalla cumissiun davart il pei da taglia, il niveligiu president communal René Epp e la suprastonza communal ei vegniu presentau e discussiunau il rapport dalla survigilonza da finanzas davart la situaziun finanziaria da nossa vischnaunca.

Tenor Thomas Kollegger ei la situaziun finanziaria dalla vischnaunca buca semplia, denton aunc buca drammatica. Ei dat da dumignar grondas provocaziuns finanzialas. Sche la vischnaunca decida da sbassar il pei da taglia, sto ella cumprovar co ella vul cumpensar quella sminuaziun d'entradas. Cheu dat ei mo duas pusseivladads, numnadamein reducir cuosts ni augmentar recavs. La cumpetenza e la responsablada da decider las mesiras schai tier la vischnaunca. Igl uffeci da vischnauncas cusseglia buca tgei mesiras prender.

Sebasond sil plan da finanzas ei previu entochen 2024 aultas investiziuns. In'impurtonta decisiun han las votantas ed ils votants da Mustér priu ils 27 da settember 2020 cun conceder in credit dad 8.69 milliuns francs pil project Center Fontauna. Las ulteriuras investiziuns dils proxims onns ein tenor Giachen Caduff plausiblas e realsticas p.ex. contribuziun alla claustra, meglieraziun, serenera, vias, canalisaziun.

L'atgna finanziaziun croda entochen 2024, quei cun mantener il pei da taglia da 120%, dad 1.2 milliuns francs giu sin rodund frs. 722'000.--. L'incarica alla cumissiun che sedat giu cun la damonda da sbassar il pei da taglia sin 105% ei da cumprovar co in cash-flow da minimum frs. 1'250'000.-- sa el medem mument vegnir mantenius el futur.

La suprastanza communal ei perschudada ch'il turissem vegn era el futur ad esser la ferma petga per nossa vischnaunca. Da quella sparta profiteschan buca il davos las pli biaras da nossas fatschentas, da nos menaschis d'agricultura ed auters menaschis.

Enconuschentamein regia en nossa vischnaunca dapi entgins onns gronda activitad davart investiziuns turisticas. Il Catrina Resort ei realisau e surdau agl intent. Pil niev project Hotel Acla da Fontauna cun ca. 200 stanzas e rodund 90 habitaziuns administradas ei vegniu concediu la lubientscha da baghegiar. Encunter quella lubientscha ha l'organisaziun Helvetia Nostra denton recurriu alla Dertgira administrativa dil Grischun. Il cass ei aunc pendants tier la dertgira.

La vischnaunca ei responsabla per las investiziuns ell'infrastructura turistica. Cheu vegnin nus a stuer far ils proxims onns investiziuns en sendas da spassegiar e vias per velos (bikes). Dabia lavur a nossas fatschentas da construcziun porta vinavon la realisaziun dallas novas vias da meglieraziun. Onn per onn vegn investau en quellas lavurs denter frs. 800'000.-- ed in milliun francs. Quellas lavurs vegnan subvenziunadas da cantun e confederaziun cun rodund 85%.

Remarcas generalas e survesta

Ils cuosts da personal sereduceschan en cumparegliaziun cul preventiv 2020 per rodund 2.79 %. Motiv persuerter ein optimaziuns dils pensums da lavur, cunzun enteifer ils pensums dallas personas d'instrucziun el menaschi da scola. Enviars il quen 2019 s'augmentan ils cuosts da personal per rodund frs. 32'700.-- resp. 0.69 %. In'ulivaziun alla carischia dallas pagas ei buca previda ed era buca cuntenida el preventiv 2021. Ils cuosts da material ed ulteriurs cuosts da menaschi sereduceschan enviars il preventiv 2020, s'augmentan denton per 17.4 % enviars il quen 2019. Egl onn 2021 ein previdas dapli expensas per manteniments (deponias, vias, edifecis comunals) sco era per incaricas specialas en favur dalla planisaziun e dalla segirtad (p.ex. plan da menaschi forestal). Tier ils recavs vegn quintau egl onn 2021 cun in sbassament dallas entradas da taglia dallas personas naturalas e dallas personas giuridicas. Fertan che las taglias dallas personas giuridicas sereduceschan muort la reducziun dil pei da taglia sil gudogn da 5 giu sin 4 %, ei la reducziun tier las entradas da taglia dallas personas naturalas d'attribuir allas consequenzas dil coronavirus.

Las grondas investiziuns ein previdas da far 2021 danovamein ell'infrastructura fundamentala sco vias, dismessa e purificaziun dall'aua. Plinavon cuntegn il preventiv 2021 l'emprema etappa dall'innovaziun, amplificaziun ed igl engrondiment cumplessiv dil Center Fontauna. In'ulteriura gronda summa ei previda d'impunder per l'infrastructura turistica en favur da sendas, loipa ed indrezs da far neiv. Ils recavs derivan da contribuziuns da perimeter, taxas da colligaziun sco era contribuziuns cantunalas.

En cumparegliaziun cul preventiv 2020 ed il quen 2019 sepresentan las cefras dil preventiv 2021 sco suonda:

<u>Quen da gudogn e sperdita</u>	<i>Preventiv 2021</i>	<i>Preventiv 2020</i>	<i>Quen 2019</i>
Recavs	frs. 15'588'200	frs. 15'786'100	frs. 15'514'682
Cuosts	frs. 14'981'800	frs. 15'651'300	frs. 14'898'645
Surpli entradas	frs. 606'400	frs. 134'8000	frs. 616'037

Quen d'investiziun

Investiziuns bruttas	frs. 7'953'600	frs. 4'157'700	frs. 4'959'860
Entradas	frs. 1'980'900	frs. 917'600	frs. 3'076'356
Investiziuns nettas	frs. 5'972'700	frs. 3'240'100	frs. 1'883'504
Atgna finanziaziun (cash-flow)	frs. 1'262'900	frs. 1'316'800	frs. 2'119'740
Emprests	frs. 18'758'100	frs. 14'173'300	frs. 12'375'000
Tscheins dils emprasts	frs. 83'000	frs. 95'700	frs. 78'161
Grad d'atgna finanziaziun	21.14 %	40.64 %	112.54 %

Quen da gudogn e sperdita

Ils cuosts ed ils recavs el preventiv 2021 semovan ell'altezia dallas cefras dil quen 2019. L'atgna finanziaziun tenor preventiv 2021 schai denton per biebein frs. 934'000.-- sut il resultat dil quen 2019 e per rodund frs. 131'000.-- sut l'atgna finanziaziun tenor preventiv 2020.

Adattaziuns principalas el preventiv 2021

0110.3170.00 Legislativa - cuosts da viadi e spesas

En consequenza dallas mesiras da protecziun encunter il coronavirus vegn quintau cun dapli cuosts per organisar occurrenz publicas d'informaziun sco era las sedutas dil cussegl da vischnaunca.

0290.3144.00 Casa communal - manteniment

Per ademplir las prescripziuns da segirtad sco era davart igl access ad edificis publics per personas impedidas ei previu d'adattar il tschabergal el zuler dalla casa communal e da montar in ascensur da scala dil plaunterren ell'emprema alzada.

1500.3612.01 Cumpart cuosts Pumpiers Sursassiala

1500.4200.00 Taxas da cumpensaziun

Igl augment da cuosts ei d'attribuir ad in alzament dallas indemniziuns pauschalas e dallas schudas dils commembers dil corp da pumpiers. Naven digl onn 2019 ein denton era las taxas da cumpensaziun vegnidas augmentadas.

Actualmein occuoran contractivas cun la vischnaunca da Medel davart adattar la clav da repartiziun da cuosts.

2 Scolaziun e formaziun

Igl augment dils cuosts nets el preventiv 2021 en cumparegliaziun cul quen 2019 ein cunzun ina consequenza da meins recavs (reducziun dil diember da scolars d'ordeifer, meins restituziuns per instrucziun da scolars d'autras instituziuns, pli bassas contribuziuns cantunalas). Per buca schar ir empaglia ils baghetgs da scola e lur indrezs ei previu dapli expensas pil manteniment (cto. 2170.3144.00). Ils responsabels per la sparta scolaziun e formaziun fan tuts sforzs d'optimar cuntinuadamein las finanzas dil menaschi da scola.

2170.3010.00 Pagas

La summa da pagas s'augmenta, damai che requirents d'asil san buca pli vegnir engaschai per schubergiar la stad ils edificis da scola.

2510.3611.00 Scola gimnasiala

Igl onn da scola 2020/2021 frequentan treis giuvenils da Mustér il sutgimnasi.

3290.3636.00 Premi Desertina

Muort il coronavirus ha la suprastanza communal decidu da surdar 2021 negin Premi Desertina.

3411 Center da sport e cultura

Suenter ch'igl ei vegniu fatg els quens 2018 - 2020 deposits ella prefinanziaziun per la realisaziun dall'emprema etappa dall'innovaziun, amplificaziun e digl engrondiment cumplessiv dil Center Fontauna ella summa totala da 2.8 milliuns francs, cuntegn il preventiv 2021 negins deposits (cto. 3411.3893.00).

Las consequenzas dil coronavirus vegnan ad haver in effect negativ sils quens 2020 e 2021 dil CSC (meins occurrenz, annullaziuns da camps).

4110.3611.00 Finanziaziun da spitals

Il survetsch d'ambulanza ei vegnius surpris cun l'entschatta matg 2020 dil Spital regional Surselva. Quei ei succediu senza grevezias finanzialas per las vischnaucas. Tier il Spital regional Surselva stattan grondas investiziuns e sanaziuns sin rucca. Damai ch'il spital ei ina societad acziunara, sa el sez buca prender si hipotecas bancaras. Quei san sulettamein ils acziunaris, vul dir las vischnaucas. Cunquei ch'il spital sez ha buca avunda reservas finanzialas, eis el dependents dil sustegn finanziel dallas vischnaucas. El decuors dalla primavera/stad 2021 vegnan las vischnaucas a stuer prender posiziun en caussa.

6190 Menaschi tecnic

Igl ei aunc adina buca reussiu d'occupar la piazza dil substitut dil menader dil menaschi tecnic. Quei duei succeder el decuors 2021 e perquei s'augmentan ils cuosts da paga per bunamein frs. 25'000.-- enviers il quen 2019. Entras pensiunaments ed optimaziuns enteifer il menaschi tecnic sereducescha denton la summa da pagas per frs. 23'500.-- cumparegliau cul preventiv 2020.

7201 Dismessa e purificaziun dall'aua

Cunzun muort igl augment dils cuosts d'amortisaziun vegn quintau el preventiv 2021 cun in surpli da cuosts da frs. 67'400.-- (cto. 7201.4510.00).

Tenor las directivas da cudischaziun vegnan las taxas da colligiaziun dalla serenera e canalisaziun impundidas per l'amortisaziun dallas valurs bilanzadas pigl allontanament e la purificaziun dall'aua.

7301 Dismessa da rumien
7301.4240.00 Taxas fundamentalas

Ina cumissiun ei actualmein lundervi d'optimar la dismessa da rumien ed il menaschi dalla piazza da rimnada a Raveras. Per contonscher in quen ulivau dalla finanziaziun speciala davart la dismessa da rumien vegn ei ad esser necessari d'augmentar las taxas fundamentalas cun reveder il regulativ da taxas tier la lescha davart l'economisaziun dils rufids. Finamira ei d'incassar naven da 2021 rodund frs. 80'000.-- dapli taxas fundamentalas.

8205.3151.00 Manteniment da vias d'uaul
8205.4631.00 Contribuziuns cantunalas

Aschinavon ch'il project ed il credit per l'avertura Val Segnas – Val Sogn Placi vegnan approvai, croda l'expensa netta pil manteniment dalla Via Val Sogn Placi da frs. 19'500.-.

84 Turissem

Il manteniment e la realisaziun da nova infrastruttura turistica caschuna adina dapli expensas per nossa vischnaunca. Tenor la lescha davart la taxa da hosps e la taxa da turissem da nossa vischnaunca ha la taxa da hosps da vegnir impundida per la planisaziun e realisaziun da purschidas turisticas. Las expensas per quellas purschidas duessen cul temps vegnir cuvridas entras las entradas dallas taxas turisticas. Oz ei quei per bia buca aschia. Per quei motiv han las vischnauncas da Tujetsch e Mustér fixau el contract denter ils acziunaris (Aktionärbindungsvertrag) da reducir ils pagaments a Sedrun Disentis Tourismus SA (SDT) naven digl onn 2022. Dallas taxas da turissem van niev 80% (oz 100%) e dallas taxas da hosps 60% (oz 70%) a SDT. La differenza duei restar tier las vischnauncas pil diever menziunau. Midadas en quei punct stattan en cumpetenza dalla radunonza generala, resp. dallas duas suprastonzas communalas che representan las aczias.

Las investiziuns el territori da skis a Caischavedra, cunzun la colligiazion dils territoris da skis e la perschasiun da rinforzar il turissem da stad, pretendan novas investiziuns sil sector dall'infrastruttura turistica. Per quei ei previu d'ereger ina nova senda da viandar naven dil Cuolm da Vi viers Caischavedra. Plinavon, per part era en collaboraziun cul project San Gottardo, ein previdas sendas da bike.

8712.3109.00 Cumpra energia da concessiun ORA
8712.3109.01 Cumpra energia da participaziun ORA
8712.4250.00 Vendita energia da concessiun ORA
8712.4250.01 Vendita energia da participaziun ORA

L'energia da concessiun e da participaziun dall'Ovra Rein Anteriu SA vegn vendida igl onn 2021 all'Axpo Hydro Surselva AG. Las contractivas davart la vendita dall'energia fan las vischnauncas dalla Cadi mintgamai comunablamein. Per las calculaziuns pil preventiv 2021 ei vegniu sebasau sigl effectiv prezi da vendita sco era sin la media dils cuosts da produziun dils onns 2007/2008 tochen 2018/2019.

9100.4000.00 Taglia sin entrada

En consequenza dil COVID-19 vegn quintau cun ina reducziun dalla taglia sin entrada da 10 % enviers il preventiv 2020. Il medem vala per la taglia alla fontauna (cto. 9100.4002.00).

9300.4621.01 Contribuziun dall'ulivaziun da resursas

Legreivlamein obtegn la vischnaunca igl onn 2021 dapli daners dall'ulivaziun da resursas. Quei ei denton d'attribuir alla situaziun che Mustér ei ina vischnaunca cun fleivlas resursas. Las pussevladads dalla vischnaunca da reagir en ina critica situaziun finanziaria ein limitadas.

Quen d'investiziun

La suprastanza communal ei sestentada da setener ton sco pusseivel vid il program d'investiziun cuntenius el plan da finanzas 2021 – 2025. In'exceptiun fuorma l'investiziun per vehichels da pumpiers (cto. 1500.5060.01). En quella summa ei cunteniu la revisiun totala digl Unimog sco era il remplazzament d'in bus. Biebein diesch investiziuns vegnan spustadas dil preventiv 2020 el preventiv 2021 (p.ex. embellaziun dalla staziun e dil vitg, fermadas traffic public, concept per molocs, sendas).

3411.5040.00 Sanaziun Center da sport e cultura

Il preventiv 2021 cuntegn l'emprema part dall'investiziun per l'innovaziun, amplificaziun ed igl grondiment cumlessiv dil CSC.

Sco menziunau el messadi per la votaziun communal dils 27 da settember 2020 davart il Center Fontauna ei previu da pretender anavos dalla confederaziun la taglia preliminar en connex cun l'investiziun. Per quei motiv sto sill'entschatta digl onn ch'ins entscheiva culla renovaziun vegnir midau sin la metoda efectiva da quintar giu la taglia sin plivaleta. Actualmein ei la cumissiun da menaschi dil Center da sport e cultura (CSC) vid evaluar l'adattada fuorma da menaschi, tenor la quala il Center Fontauna duei vegnir menaus el futur. Damai che l'evaluaziun ei aunc buca terminada, figureschan la cumpart da cuosts pil CSC sco era l'emprema etappa dall'investiziun sco entochen dacheu el quen communal.

Ponderaziuns finalas

Il preventiv 2021 ei vegnius calculaus sebasond sil pei da taglia d'entochen ussa da 120 % dalla taglia cantunala ed il pei da taglia per la taglia sin schischom dad 1.7‰. Cunzun en vesta allas grondas investiziuns che la vischnaunca preveda da far ils proxims onns el Center Fontauna, en indrezs turistics sco era ell'infrastructura communal da basa eis ei indicau da mantener il pei da taglia sil nivel actual.

Ils 26 d'october 2020 ha la cumissiun da gestiun repassau il preventiv ensemen cun la suprastanza communal. La cumissiun da gestiun sustegn la proposta dalla suprastanza communal d'approbar il preventiv 2021. Ella taxescha plinavon la proposta dil pei da taglia per las entradas e la facultad sin 120% dalla taglia cantunala ed il pei da taglia per la taglia sin schischom dad 1.7‰ per necessaria.

Ord ils documents aschuntai al messadi ein las cefras detagliadas sco era ulteriuras cefras indicativas veseivlas. Ils detagls tier las singulas posiziuns ein cuntenidas en in commentari. Sco usitau han las cusseglieras ed ils cusseglers la pusseivladad da prender investa da quei document sco era d'ulteriura documentaziun tier l'administraziun communal (s'annunziar al spurtegl).

Per garantir in tractament efficient, supplichein nus ils commembers dil cussegl da sclarir damondas da pintga muntada ordavon culs caus da departament ni d'uffeci, resp. cul canzlist. Damondas ni propostas da pli gronda muntada, supplichein nus d'inoltrar ordavon all'administraziun communal, sinaquei che las preparativas necessarias per in tractament serius e speditiv sappien vegnir fatgas.

Propostas

En concordanza cun la cumissiun da gestiun

propo na

la suprastonza communalal al cussegl da vischnaunca da:

1. approbar il preventiv 2021 cun suttametter quel al referendum facultativ conform ad art. 21, lit. a dalla costituziun communalal;
2. fixar per 2021 il pei dalla taglia sin las entradas e la facultad sin 120% dalla taglia cantunala ed il pei da taglia per la taglia sin schischom ad 1.7‰ (sco tochen dacheu).

Suprastonza communalal Disentis/Mustér
Il president: Il canzlist:



Robert Cajacob



Andri Hendry

Disentis/Mustér, ils 26 d'october 2020

- Survesta dil preventiv 2021
- Quen da gudogn e sperdita - preventiv 2021
- Quen d'investiziun - preventiv 2021
- Quen Center da sport e cultura - resumaziun preventiv 2021
- Controlla da credits
- Rapport dalla cumissiun da gestiun concernent il preventiv 2021 e la fixaziun dil pei da taglia